



INTRODUCZIUN

DAD ANDRI CASANOVA-BAUMGARTNER

Jesus semetta danovamein sin via ensemen cun quels ch'accompignavan el. De facto entscheiva cheu il viadi viers Jerusalem. La grupp ei en moviment. Danovamein annunzia Jesus sia passiu, mort e levada. Siu patratg tonscha lunsch, mo ils giuvnals capeschon buca ses plaid.

Arisguard la mort e levada da Cristus paran las discussiuns dils giuvnals deplazzadas. Mo quei lubescha a Jesus da tener eri ed instruir els. Tenor vegl usit succeda quei enten seser: «Sch'enzatgi vul esser igl emprem, seigi el il davos da tuts ed il survient da tuts» (Mc 9,35b). Quella tenuta vegn annunziada en tut ils quater evangelis. Ella fuorma in punct central digl esser cristian. Nus tuts essan clamai da survir in a l'auter. Esser cristian munta dad esser survient (grec: diacon) per in e scadin.

EVANGELI

Mc 9,30–37

³⁰Partend da leu, han ei traversau la Galilea, ed el leva buca ch'ins sappi quei. ³¹Pertgei el instrueva ses giuvnals e scheva ad els: Il Fegl dil carstgaun vegn surdaus els mauns dils carstgauns, ed ei vegnan a mazzar el; mo treis dis suenter sia mort vegn el a levar da mort en veta. ³²Els han buca capiu quei plaid, vevan denton tema da dumandar el.

³³Lu ein els vegni a Cafarnaum. Entraus en casa, ha el dumandau els: Tgei vevas da discutir sin via?

³⁴Els han cuschiu, pertgei els vevan giu da sefar sin via, tgeinin dad els che seigi il pli grond. ³⁵Cheu eis el sesius, ha clamau neutier ils dudisch e detg ad els: Sch'enzatgi vul esser igl emprem, seigi el il davos da tuts ed il survient da tuts. ³⁶Lu ha el priu in affonet e tschentau quel en lur miez. Embratschond igl affon, ha el detg ad els: ³⁷Scadin che retscheiva in da quels pigns en miu num, retscheiva mei; e scadin che retscheiva mei, retscheiva buca mei, mobein quel che ha tarmess mei.